

四庫全書

集部

欽定四庫全書

至正集卷四十二

元 許有壬 撰

記

務本齋記

士盍觀夫水之與木乎水由涓滴為溝池為江河而放
乎四海漑漫功利古今不竭也木始毫末而拱把至昂
霄聳壑大可梁柱明堂細不失為椳闌店楔無不適於

用者何哉有本而已矣士之為學其亦有所務乎士何
務曰務本論語首篇所記皆務本首章聖人言學後即
繼以有子君子務本之言誠以根本既立如苗之於根
由是而生有不期然而然者矣務本齋者宋故衡安仁
馬亨復先生書屋也亨復從北湖姚輔之受易而歸北
湖以朱子書務本洎誠齋著務本說為贈因以名其齋
焉至元丙子燬於兵字若說皆喪後至元丁丑孫熙明
初即故基作屋介其友乞余書京師而明初未識也庚

辰始識之長沙道同氣合遂辱留不忍去明初謂扁得
於昔記不可靳於今也愚昧於剖析而不能拂其請昔
子夏子張子游以有若似聖人曾子獨以為不可至有
江漢秋陽之喻後之學者不能無疑焉然觀君子務本
之言則其於聖人似矣人生有父母兄弟有子言務本
始於孝弟則三綱五常悉由是出仁民愛物舉而措之
爾此所謂本立而道生者猶水木之有本由是而至於
其極也若夫天下事物有本有末則又對待之言也舍

其本而趨其末者衆矣故愚因務本之說而旁及對待之言非悖也因有警焉故孝也者敬其本也養其末也未有事親以敬而不能養者也忠也者誠其本也事功其末也未有事君不欺而事功不立者也書以五經為本百家其末也通乎經則百家迎刃而解矣文章以理為本辭華其末也未有得於理而不得於辭者也引而充之有本則有末學者知所先後其亦有益於為務本之學者乎亨復不幸才三十而卒子棧敬孚世其業長

茂而實遂至明初則道之生也生生無窮矣愚不能有以益之也然竊誦大學曰自天子以至於庶人壹是皆以脩身為本易曰復德之本也蓋修身則道立復則心不外而善端存故務本者又當先於修身而修身又當先於心不知誠齋之說如何何當一見而啓愚茅塞乎大名路重建銅臺驛記

良二千石之作郡也其猶家乎古有之處官事如家事然後能盡吾之心旨哉言乎若近而實遠推而極之則

治具之大小畢張矣夫宣化養民固其大者而吾部內
關於政者一苟不備顧不瘵吾治乎民生粟布以禦飢
寒屋以待風雨器以適用未有闕而不求敝而不修者
也何獨至官事而若是愬哉且羣居往來自非匹夫傭
屋未有不規函丈地以肅賓者况提封千里上有王人
下有報政四方行李之往來則館舍非為政之先務乎
大名在漢為魏郡後周為州唐始號大名府而宋建北
京今為上路實河朔大郡也郡視古諸侯館人所職固

當高開闢厚牆垣以無憂客使而自後至元丁丑大水
蕩圯賓至率假廛邸至正癸未九月河東廉訪副使托
迪來監茲郡視民所欣戚及事之病益民者悉罷行之
惟驛舍之圯迨茲七年事上禮賓大懼弗稱即倡僚屬
割俸金購材庀徒躬相厥役乃堂乃廡乃庖庫湑廢洎
食飲宴息之器物巨細畢具倅來願有述也余惟古者
王使之至侯邦與夫承王命而為過賓者郊勞致館之
儀饗餼芻薪之節官正莅事上卿監之諸侯以正事出

諸侯之大夫士以君命出或戾其所止或道其所由授館展車各有攸司賓至如歸莫不懷愛我國家際極覆載悉入版圖舟車所通傳置交貫事雖因古而法制之詳實過之侯甫下車興廢補敝首復驛舍知所先後矣昔單襄公奉王命聘楚而經陳候人不在疆司里不授館有以知陳侯之失德晉文大諸侯之館圯人以時塋館宮室鄭僑誦焉近代有刺韶州以創驛堠而立生祠宰萍鄉以驛傳完葺而受知天使則侯之是役可以觀

政矣孫譙記褒城驛而謂州縣皆驛者以刺史縣令任之既輕變易又數其於為政則曰我即去何用如此則州縣真驛也彼視官如驛而侯視驛如家愚哲判矣故為記其顛末以示後之為政者

菊莊記

安陽地稱秀麗昔人引洹水注城內為園池環城之池晝夜湯湯民室酒壚擇奇據勝無慮數百區西南匯為陂溪山之輸委亭館舟楫之盛麗蒲荷葭柳羽鱗狸狐

之饒益實最一郡水不修民生日蹙陂遂為陸而亭館
為墟矣好事者或事築植胥徒一假館花蹂木戕器敗
屋損供頓少弗恆有遂賈禍者故莫不恣其敝穢而已
焉余歸方事遊嬉而無所於適送客南郭歸並闥闔而
西微行詰曲桑榆蔽翳負城有小圃徑造焉地僅餘百
弓庶麻幽潔問守者曰此王君季貞菊莊也雜花並植
菊最多故以名時方挺翠怒長羅列滿地愛之不忍歸
秋風作花見餉十盆品色莫有同者莖高尋丈花大徑

三寸餘蓋培溉有時芟移有法半歲勤動而後有成信
菊之拔萃者也季貞知予同其愛介其友請言吾方慨
吾鄉風物之非昔而嬉遊無所於適也能無情乎淵明
曠達芥視軒冕乃獨愛菊屢形詠歌至與松並稱茂叔
談道有取於蓮並稱者二富貴者在所薄菊獨以隱逸
稱譜之詠之者又代不絕口其貴重可知已季貞其亦
慕古人而有見於菊者乎人生之樂隨寓可得口體居
室不與焉故不他其藝以見其志不侈其圃以納其侮

百弓之地可游可樂胥徒藐之而不屑來沒吾齒莫有
睨而規之者求寡而獲豐身安而志遂是莊之德不亦
多且久乎莊田舍也田舍穀為稱首不莊於穀而於菊
穀吾口之所切菊吾心之所樂吾口寧緩而吾心不可
不適也心適矣視如京如坻漠如也古有午橋莊築山
穿池竹木叢萃固盛德之宜居後之主者已墮屠兒墓
園之譏平泉莊之鴈檜珠栢雖曰僅存尋亦蕪絕矣富
貴田宅之不可恃如是夫九原可作吾其從晚節之老

圃乎且吾為人莊而日就荒人為吾莊而不獲一稔獨
幸得歸而時游王氏菊莊庶幾鄉賢之萬一焉記菊莊
而及鄉賢者高山仰止吾鄉之士其勿以菊莊為嬉而
已也

乾明寺記

余謝事歸里有寺曰乾明主僧德訓時過余既乃相告
曰佛居西方以七寶為宮室中華事之每窮土木之役
然茅屋越席神亦安之亦誠而已吾寺無貯儲業精者

驕荒者怠驕與怠相遭濟之以貧寺日廢矣訓祝髮事
佛主講若壇信者禮施豐約不敢校歲久積楮幣為緡
萬五千有奇乃構大雄殿像設藻繪堂室庖湑大小俱
興經始至正甲申二月落以乙酉十月雖不足比隆傑
刹計佛亦與其誠而安之矣且訓見吾徒競錐刀如市
商惟私其身一旦捐衣鉢啓爭貽笑故就今尚健盡以
奉佛焉公不我揮故敢以告其徒福祐德成復踵門請
曰微師吾寺幾墜願紀於石相城故多寺由隋迄五季

有興無廢周顯德中廢省存者僅二十而無所謂乾明者宋李回作郡志始列乾明禪院豈宋所建耶易院為寺又不知何時唐賜額者為寺私為招提蘭若若山臺野色皆是也佛以清儉為宗其見勞人糜財果樂此乎昔之佛者斷薪續牀把茅蓋頭未聞以締構雄侈為賢也長蘆宗頤師謂梁武之禍由崇奉不能清儉所致詎不信哉訓也居而能儉積而能散嗇於身而豐於佛懲其徒而矯其弊亦賢乎哉今海內名山寺據者十八九

富埒王侯有興作猶資於衆因而利之此雖大小不侔而得失亦判然矣佛之說高者凌青天深者入黃泉其淺而近者曰不貧不癡訓也其庶乎余旣聞訓之言又重違其徒之請求其故掇其法之緒餘為之記俾嗣者有所徵焉

樂閒堂記

人物之生於世安於其素而不知其樂者衆矣魚在水獸在山不知其樂也處之涸轍繫之虞人而後知江湖

山林之樂焉釋而從之俾復其故則其為樂始真知矣
物皆然人為甚賤而服賈陸有摧車水有覆舟虎狼盜
賊風濤蛟龍之險卒然遇之號呼丐命於須臾而後知
平地之樂也而仕者又甚焉仕而達矣若可樂也而其
憂苦方叢乎其前事有必爭而不容已者不爭則獲罪
君子貽誚後世爭則彼方震以雷霆壓以山岳惑以簣
鼓大廷列坐十九瀾倒而欲以抔土障之當是時也思
得釋去重負歸為閒人則其樂為何如此憂也有苦焉

造謁之疲精神送迎之勞筋力晨興趨府干請坐來折
簡函丈手未及展繼者沓至至擁馬不得前暮歸復爾寒
暑不間休暇匿避若逋逃堅閉若自錮一接賓客遂終
日不得食思得脫巾履偃仰牀第又如蓬萊之不可到
也上則不能過矢去川決之政下則不能厭蠅集豕貪
之求憂苦雖極謗議蜂起矣夫人未嘗不知閒之為樂
而真知者寡余蓋身履其境急遽疲極而後獲閒其為
真知猶座中談虎而嘗被齧者也鄉人孫友賢受益居

安陽銅冶卓宛之業而以清慎聞於人集賢院降劄褒之曰樂閒冲素處士集賢握玉章司天下道教凡名隱者率號處士又華以冠之受益因以樂閒顏其堂乞言於余受益不游不試不險於途不困於責安於其素而能知其樂者乎其知不知予不能知而集賢標榜之其知其能知其樂也若是則華而不浮矣雖然受益又當讀涪翁之文知收其餘力而就閒之說則可以永此樂矣

陝西行中書省題名記

至正丙戌冬陝西行中書省平章政事托多公合其寮
案移書有壬曰吾省據要重以控西北南三陞者八十
五年矣昔保釐長貳若廉希憲商挺賽音迪延齊皆蔚為
名臣而無託以徵及今亟求已不可得乃斷自後至元
元年得若干員刻之石識往行最後繼敢以屬子有壬
惟陝西當天下一面名雖數更地之雄劇則古今不異
也我元天造立宣撫司以養以治中統三年始立陝西

四川行中書省至元二十三年朝議分省四川咨答轉
滯改陝西行省而四川自為省矣中更宣慰司者一尚
書省者二尋復其舊此其大較也世皇宏規遠模立中
書省總於中分省釐於外行省遵成憲以治所屬決大
獄質疑事皆中書報可而後行則為行省若甚易者然
地之所直有險易則任之所寄有重輕矣秦地形勝之
雄建瓴東夏分鎮夾輔宗子維城臣工旬宣實任其重
中統初廉希憲為宣撫商挺副之同寅行省治難為易

繼以賽音諤德齊山川之險適足以固吾之國故地之險夷視人愚哲朝廷慎簡宜何如哉則是保釐長貳之善可為法惡可為戒者皆不容泯此所以有待於題名俾後世得以指議也國家百年來法令明備遵之者福戾之者罰若殛隨所戾而至孰敢不畏然人情有玩於法徂於習而不知畏者於是法有所不行矣而其本然之善則未嘗泯可觸之機則未嘗息題名一刻俾一見之頃知某之為善使人歆慕若是我獨不能效之耶某

之為惡使人嗤嗤若是我獨不能戒之耶用是為政豈
特為法之一助而彌惡遷善蓋有出於法之外者焉尚
論古之人由周而來著績斯土者軌躅相接迭聽風聲
皆吾師也若夫德於人而未忘迹於事而未熄率而踵
武其文正乎平章暨諸公竭誠踵武罔俾專美矣斯石
之刻又與人為善於無窮焉後之來者知其名之必列
於斯也可不畏乎虛其石以待之

弘齋記

人生天地間以藐焉一身參而三之亦有道乎窮雖獨
善若進德居業之富討論資攬之備大而民彞物則繁
而酬酢日用莫不總括其理而積於其身及達而兼善
也堯舜其君三代其民圉一世於太和以至鳥獸草木
亦各使之遂其生育之道天下事物紛錯坱圻莫不有
以容之容之者何弘之謂也弘也者隘之反也此得彼
遺即隘矣雖莫不有以容之亦莫不有以別之也夫子
曰人能弘道言人能有知思可以大其所有之理也子

張曰執德不弘言有所得守之太狹則輕喜易足有一善自以為天下莫已若矣道而曰弘我之力也德而曰弘我之量也聖人示人用力之方才高意廣失於辟者亦有以充其量也承旨開府公器宇汪汪若干頃波扁齋曰弘日與儒士講學其中蚤襲宿衛歷俸常太禧宣徽翰林宗正宥密皆有聲所以大其理守其得者已至矣噫士大夫讀書非不博也才氣非不贍也而其成就卒於無稱何哉患不弘爾聖人大管仲之功而小其器

者豈不以其不知聖賢大學之道故局量褊淺規模卑狹功烈如彼而已乎公於是理講明已熟用力已至然任重道遠又有毅焉曾子曰士不可以不弘毅於事業求所以為弘者則内外交修本末兼盡他日見諸事業綽綽有餘裕恢恢有餘地矣公命為記輯先儒緒論而為之書

至正集卷四十二

欽定四庫全書

至正集卷四十三

元 許有壬 撰

記

御史臺照磨題名記

世皇立御史臺肅天憲以正百辟上官底僚罔不各極其選或損或益適於當而已厥初無照磨官至元壬辰臺臣以贓入既夥出納無適爰始奏設又慮員之冗也

乃以其職冠承發管勾兼獄丞之上遂為定制焉迄今五十七年階是騰為達官者不知幾人而湮沒無聞者亦復不少今照磨蕭栗刻其姓名於石徵記於愚愚惟照磨兼承發獄丞一人而三職也獨稱照磨者舉其概也金穀則欲燭照磨研厲其隱失也簿書則欲久近有稽出入無格也囹圄則欲大而無抑無廋小而無淹也三職克盡善哉加焉一或不舉事因有墮矣況三悉不舉者乎抱關擊柝雖賤必敬況列為憲屬冠豸乘驄實

權輿於是者乎彼有居其位食其祿卑小官以為不足
為高談計月取償華貫不待後之指議憲條森嚴有議
於今者已蕭君起家胄監已出官辟為臺郎除是職其
言曰前乎栗題名者善不善皆栗師也後乎栗題名者
栗不敢知而竊有望焉愚嘉其三職之能舉而其言復
有取也故為之書

緱山書院記

古王宮至閭巷莫不有學學其學者非有異事也明天

常盡人道而已若庠若序約義異稱教則均爾姬轍之東寢不古若以鄭僑當國且有欲毀鄉校者而況重之以秦火離之以異端斯文不喪天實相之學校開設日興月嗣若夫書院之號則昉於李唐之麗正郡邑未有也趙宋即老師宿儒講學之地賜額洎書若白鹿嵩陽應天獄麓遂為永額焉紫陽朱夫子守南康拳拳於白鹿夫豈不知所先務哉我元戡定伊始即崇文教南北旣一黌舍遂徧區宇漸濡百年而書院之闢視前代倍

百矣贈翰林學士資德大夫上護軍魏郡杜文獻公瑛
字文玉其先霸州人金季避地緱氏山中授徒汾晉間
學者即舊隱稱為緱山先生中書鉅赫珪聘至相因家
焉世祖徇鄂過相嘗召先生問計對以三事稱旨且勸
上數事後皆如其言及即位徵之聞王文統當國不起
授懷孟彰德大名等路提舉學校官又不起其導中書
也則以緩刑薄征廣學納士為先其移書執政也則以
溯流求源拯百千年之禍為務所存不亦遠乎於書無

不讀讀無不記記無不究其趣者著述有春秋地理源委十卷語孟旁通八卷皇極引用八卷皇極疑事四卷極學十卷律呂律歷禮樂雜志三十卷文集十卷大約明注義之未瑩補先儒之未足時出已見以祛後學之疑中書嘗予良田千畝不受知屋下有藏金不發是雖若小不義而千駟萬鍾其屑乎卒五十七年有贈謚之命又十三年河南部使者請建書院廷議題之以緱山為額實至正辛巳五月也守臣以官所度地湫隘不稱

謀於其孫封彰德路總管愚相攸坤維得故王氏萬卷
堂堂故崇且廣子孫廢撤殆盡相與哀金易之修大成
殿殿後為先生祠東西齋仍其舊又七年今郡守朱彥
亨與其曾孫中書省左司郎中秉彛作講堂以居師生
新戟門以嚴中外始幾於完矣彥亨合其僚移書有壬
曰文獻子鄉先生也麗牲之石宜有刻文舍子其誰有
壬孩提知先生義不敢讓且讀山長馬君熙所為狀犁
然有當於心者馬君謂先生著述雖有先儒之已發而

其自得蓋十九焉概舉其要以為的然見道之言其知
言哉先生出處大節屹然山立視榮達為何如身後祠
像之有無不校也然士為學必使後世從祀孔庭而後
為至下是亦尸而祝之非以為榮而以見其為學之至
且以淑鄉里興後人焉有壬生晚不獲親炙而幸托名
先生之碑可不因有以語吾鄉之士乎夫學其學者皆
人之所當為為子必孝為臣必忠如手之必持足之必
履宜無待於上之風厲也天降下民作之君作之師上

之人有不容已者焉方今勉勵長育明詔諄復居之有地誨之有師而吾鄉先生貽範有書讀其書而求其心瞻其容而踐其行成德達材由是輩出則書院之設為不虛矣有壬敢便便若是者誠欲明先生之道以淑鄉里也惟吾士其勉之

總春亭記

饒樂平朱彬可取考亭夫子詩額池亭曰總春其鄉人宣政掌故黃君仲綱諗記於余余以未識彬可辭仲綱

亟言之知彬可人釋辭其可朱氏之先世居新安後徙樂平之清原秀嶺高林流泉沃壤彬可堂構其間鑿二池亭其上不質不華可琴可書可命尊壘以樂友生水陸草木效奇獻秀自行自色自花自實寒暑有代謝而品類更相發榮無適而非春池之蓮窗之草前川之花柳無適而非道也亭號曰總春其誰曰不宜雖然華於春者不若夏秋冬之多而悉歸之春何哉華於三時而生意實自春始歸之春原其始也余嘗達觀乎萬物

妙觀乎一原維天之命於穆不已萬殊之所以一本也
乾道變化各正性命一本之所以萬殊也學者究其用
而未究其體悟其貫而未悟其一故於水陸草木但知
其為萬紫千紅而不知其無適而非春蓋自老安少懷
之言絕浴沂詠歸之迹熄尋芳勝日豈無他人求其領
無邊之景識東風之面舍考亭夫子其誰哉嗟夫盈天
地之間皆物也而有所謂植物者焉肖形雖異資氣則
同因植物之同而知萬物之同總春之義大矣哉彬可

為考亭疏族嘗來京師從縉紳先生游其亦有聞於此
否乎予不得而知也他日仲綱登總春之亭歌考亭之
詩然後以予言問之

景韓堂記

相為河北重郡牧守著稱世艱於聞周秦邈矣後蓋可
考焉若漢京房黃香唐宋景房瑄數百年間指不易屈
趙宋羅彥瑰而下尤炳炳者其魏國忠獻韓公乎公前
持武康之節知相後兩以淮南之節司徒兼侍中判郡

蓋古之牧守與宰相同故黃霸潁川治最即入為相而
魏公以兩朝顧命定策元勲三守茲郡其重可知已夫
以千里之治移之天下舉而措之爾而宅百揆憂患之
域一旦釋重負斂惠一方則又朝廷用人弛張之道焉
流習輕外訾為徒勞膠滯朝著不肯一出國門雖自冗
員擢為方面皆為下遷倪若水見班景倩入為大理謂
之登仙流習之鑑乃至是邪我元重近民之仕作法辟
舉屢議屢更必欲真得其人與之共治然卒未聞卓爾

在天下者豈風厲振作之道有所未盡邪皇上勵精圖治一新其法內外通融凡久在朝著者覈其才考其資俾典郡邑河南行省理問太原朱侯彥亨擢彰德路總管以其敷歷中外靡不著稱首膺是選也侯以剛明之資一旦莅政百廢俱興剔蠹揀荒令行禁止由是名達九重驛賜金段歷徵往躅不一二聞而達魯噶齊沙喇卜丹桑節判官馬德淳推官姜彬同寅協恭知事王大

本照磨李弘道畫喏平允郡以無事於是葺公署之後

堂扁曰景韓蓋景行先哲慕魏公為法微記以訓詩不
不云乎高山仰止景行行止說者謂景行大道也言高
山則可仰景行則可行若魏公者非高山景行乎凡天
下牧守皆當儀型於百世下况踵其武踐其位者乎緊
其三至合四十餘月利澤之及人如決渠浚隍柵柳廩
粟闢牙城除戎器奏罷鹽鐵以紓民力乞國監書以基
風化皆宏遠之規非為目前苟且計者至於秉鈞調元
天下均受其賜豐功偉績史有不勝書者然愚竊疑先

儒稱其務容小人豈含糊求合於人乎蓋君子必欲充其量而後可以有所容可以有所容而後可以施諸人可以施諸人而吾之事業成矣雖大而弼亮三世救寧四方獨運廟堂再安社稷亦由是而推之爾且魏公作郡作相無一不可為法而愚獨稱其量者誠欲諸公法魏公必造其極而一政一令之及閭閻者在其中矣所謂牧守與宰相等者其尚有資於是焉後之守倅觀是扁也其亦致力於實踐哉塾巾慕郭解憤效王則前政

專美矣是為記

承恩堂記

皇上御天之十六年勅中書慎簡守令或陞辭親勉或
中書喻旨皆錫宴敦遣曠典異數所以必其稱而期於
治也安陽吳密掾臺出官佐奉使宣撫竣事擢尹渤海
將行請言有壬時待罪中臺嘗序以餞既而朝廷遣使
覈治忽之迹而渤海之政在治列復最它治中書以聞
有金緞之賜密因扁其解之堂曰承恩有壬既為大書

而渤海之民李信義李玠蕭克敏劉誠復諉儒者王憲
俾請於有壬曰吾明府吳君德我非一思永其傳而刻
銘戾法侯為去思則吾民不忍言其去也承恩有堂苟
因記之不惟彰君之賜而吾明府之善因附以傳顧不
兩得乎又東平韓學詩撰德政詩百首首括一事皆炳
炳在人者軼王允規十奇而過之遠矣有壬昔之序有
曰余雖不與考績尚能為子紀其實密也在邑不二年
治效有成紀實踐言記其可辭語曰君使臣以禮臣事

君以忠有壬於是有以見為治之機焉各欲自盡而已
昔有賜緋衣或百縑或衣一襲非私也亦盡其使臣之
禮爾厥後但聞有罰使以禮未聞也治不古若有以哉
皇上徵往古發言震衷海濱遠邑至遣使賜賚盡使臣
之禮矣昔人在畎畝不忘君而一飯之恩必報况恩隆
山嶽以忠報稱宜何如哉不名之堂不足以暴其恩報
之誠不於家而於公署又以垂勸於後來而臨民聽訟
之際顧瞻堂扁凜乎其陟降左右也敢易其心乎且今

能盡其職德於民名其堂慙於報而其民又能不忘令德以示於永久一邑之治可知已推之天下有不治乎而天下之大一時承恩者幾人名堂恩報者有幾而恩之未逮者先儒嘗謂不患使不以禮患忠之不足蓋亦自盡其道乎密也植志不回爵祿汨汨異時畫錦歸故鄉其權輿於是繼踵而登斯堂者尚有望焉

公生明堂記

彰德屬州曰林俗淳訟寂號易治且山水可適高堂孫

君徹徹篤由中書直省舍人來倅是州上官與其能小
民安其政山水之適則未遑也州治西北有公明亭圯
廢已久金承安間宋黻記文名刻故在一日孫君洎其
守若僚請曰亭故遊息地今不能復其扁則可取然不
若用其全句之該也丐書公生明三字揭之州堂日視
以為儆予喜為之書既又請抒其義以發其部請亟而
切乃為之說曰公之為義大矣哉天無私覆地無私載
日月無私照黃帝之治天下語其輔佐亦曰公而不阿

而已周官曰以公滅私民其允懷說者謂以天下之公理滅一己之私情則令行而民莫不敬信懷服矣則是公之為用通三才而一之自天子以至於畬夫板尹不可須臾離者也人稟天地之中以生具衆理應萬事者心也虛靈洞澈無物不燭一蔽於私蒙昧昏錯而其本然全體固自若也苟卿於是立公生明之說其啓人至矣蓋公也者無私之謂也無私則淨淨則明明則如鑑照物妍媸黑白舉無遁形明也者公之發見者也而所

謂生者謂有此公即有此明猶播種於地而必出焉以之扁堂觸目儆省而又克已復禮以立其體應事接物以適其用不徼名以為公不仕數以為明一毫私欲無自而入理之微地之遠莫不瞭然在吾目中尚何覆瓿之有哉若夫不下比以閤上不上同以疾下分爭於中不以私害之荀卿所謂公士者諸君得之矣推公生明之極致尊君愛民物至而應事起而辨將不盡為通士乎諸君其勉之

河南省檢校官持平堂記

河南省南控江淮西倚崤函東披海岱以輔承京師中
土大方面也地重事劇鉛槧膠葛酬酢坐省雖有敏者
不能必其無戾焉隨事釐正不遠而復此檢校官所由
設也夫以七品之職釐一品大府之遂事其任亦重矣
哉而弱者俯仰詭隨謬愆何望強者取嫉於上陽示委
注陰實遠之終歲跋跋不安其席於是官以之曠而事
以之隳矣至正戊子春中書知管差除掾濟寧羅吉擢

任是官冬右司掾河間王國瑞繼至協恭交修翕然著
稱剴治就緒得以展布餘力顧瞻公署歲久將壓請諸
上司出公帑葺之甫逾月煥然改觀扁曰持平余既為
大書尋復請記夫天下之至平者惟水與衡而已大而
江河小而溝池其平中準大匠取法焉石或礪之則不
平矣重而千鈞輕而鎰銖應之以權無弗平者手或撓
之則不平矣今夫疆域之大事物之夥金穀也銓總也
工作也傳置也湮而欲發也泛而欲防也梃而欲行也

躋而欲正也不礪不撓則能適於平而不礪不撓其亦
有道乎荀子曰士大夫以上至於公侯莫不以仁厚知
能居官職夫是之謂至平惟其本之以仁厚行之以知
能施於有政無所往而不得其平矣韓子曰物不得其
平則鳴檢校不任他事專職於此一失其平不惟瘰癧
官鳴者紛起矣而況大官臨之吏屬睨之可不慎乎執
玉捧盈持而勿失階是而理機務天下且平況一省乎
二君勗之且以告後來者

魯齋書院記

至正乙酉江西湖東道肅政廉訪使李守仁言魏國文
正公魯齋許先生為我元儒宗從祀孔子廟廷而覃懷
先生之鄉大德間鄉人王紀作祠廟學西偏庠隘弗稱
昔濂溪為南昌丞宗濂恢設况道州其鄉乎覃懷猶道
州也故中書廳永額為書院校職屢更祠則仍舊歲久
且壓守臣嘗請郡巽隅地構築未報宜亟作以副書院
名是牘上報可之符始下先生孫今河北河南道肅政

廉訪使從宣入其宅地塹夷曠過請地判官馮棋更始石國英代之同知李守敬輩一乃心力市材庇徒成祠而奉遷焉前為兩序後為講堂東西有齋峙以重門繚以周垣西偏作屋以居校職神居有嚴講授有地書院之名實副矣倂來屬記有壬昔長中書左司陪先生子右轄公師敬時聞過庭餘論且讀遺書亦私淑者也義不敢辭夫道統在天地間由開闢迄今日未嘗一日斷絕明晦有時爾接而明之其人乎孟子謂五百年必

至正集

際正始以理萬事端本以暢百支則其時也乃有申韓
邪說雜鶩於中其言甘而易入其功卑而易著舉世依
俛以為開物成務如斯而已當時辭而闕之者其有所
自也卒之正言以驗正道以明使踵之者知其不容於
正途懲塞其將來蓋攘斥之功出於平居講明聖學辨
別邪正之有素也其有功於世大矣世徒知道統之有
在而不知所以羽翼夫道統者又有在焉至大庾戌集
賢大學士姚公燧作祠堂記猶以未升從祀天斲築室

為言皇慶癸丑始從西臺侍御史趙世延請暨宋九儒
升從祀建書院京兆記則翰林學士承旨程公鉅夫筆
也元統乙亥皇上勅翰林學士歐陽玄為神道碑與夫
制誥贊誄記銘推明道統之所在者至矣有壬晚學設
聞無所容喙矣竊惟先生之道在人心夫何遠邇之有
聞天下從祀感觸之機大矣懷之人固囿其中而猶屑
屑鄉里者豈不以鄉里視天下其感觸之機又有捷於
桴鼓者焉王烈居鄉爭田者望廬而返陽城居晉鄙薰

其德而善良者幾千人况道德度越二人者乎懷之士
過先生之祠有不惕然而興者乎昔先生之教育懷孟
也制祠有曰再令董子惟前有傳授之弟子王通門下
皆經濟之名臣有士於懷之士有望焉



至正集卷四十三

欽定四庫全書

集部
至正集卷四十四
王

詳校官編修_臣錢樾

侍讀_臣孫球覆勘

總校官降調編修_臣倉聖脉

校對官中書_臣滿曾起

膳錄監生_臣戴高

欽定四庫全書

至正集卷四十四

元 許有壬 撰

碑志

上都孔子廟碑

至元二年丙子歲七月庚午皇帝御洪禧殿太師秦王
中書右丞相達爾罕臣巴延率中書臣僚奏上都世祖
皇帝所城至元間作孔子廟仁宗皇帝修其敝增兩廡

庖館故事當刻石紀列聖崇文重道之實以詔後世石
已具擬中書叅知政事臣有壬為文奎章閣侍書學士
臣庫庫為書奎章閣承制學士臣師簡篆其額留守臣
董其樹立制可臣有壬被詔悚慄罔知攸措洪惟聖朝
肇造區宇亭毒運用之大功並開闢而孔子之道猶天
地日月人無能名若臣之愚其何以鋪張天休闡揚至
德若夫列聖崇文重道之實徵諸聞見或可復明詔萬
一謹拜手稽首昧死而言曰昔我太祖皇帝之應天啓

運也干戈中徵耶律楚材置左右備諮訪聞周孔教深
用嘉納知天下不可馬上治立十路課稅使副皆用儒
者國朝尊孔道用文臣實自是啟之太宗嗣位修曲阜
廟孔子五十一代孫元措仍襲封衍聖公置編修所於
燕經籍所於揚以開儒治輦曲阜雅樂俎豆祭服至日
月山王鶚以孔子像達北庭命秋丁行釋奠禮飲福均
昨歲以為常收羅儒士俾轉教授遣斷事官穆克德山
西東路課稅長官劉中徧視儒人中者與牧守議停蠲

其役且將闢舉塲以精入仕擇筆且齊子十八人學漢語文字漢官子參學國語弓矢擇師分四隊以教命中書令楊惟中主其事作屋居之餽廩育之復楚督之迄定宗朝不輟憲宗悉除漢地河西儒戶徭役世祖在藩邸招納儒士撝謙問答知草澤一士賢飛書走幣猶恐失之燕廟學汨於道流奪而歸之儒增修敝陋聞竇默三綱五常之言聖見超詣即謂人道無大於此失此則不名為人且無以立於世及正大位詔先聖廟國家致

祭宜恒修潔官若使若軍馬毋泊其中理訟褻宴營造
者有罪內設國子監學外分提學教授以職教議行貢
舉法以取士督有司以主領責按察以勉勵儒籍者復
之材成者擢之分田制祿以奉祭祀以資營修以祿其
師以廩其徒而學政備舉矣成宗首詔敦勸且議貢舉
又特詔中外百司申世祖之制其畧曰孔子之道垂憲
萬世有國家者所當崇奉而曲阜上都大都又專言之
聖意所注可見矣武宗仁宗英宗文宗恪守祖訓凡大

播告必首及此武宗加號大成遣使闕里祀以太牢示
萬世無上之絕尊仁宗行賓興法先德行尊五經繼志
述事有加焉今上皇帝三降德音靡不懇切此徵諸聞
見班班有據者也尚論歷代之興禮樂制度莫不相因
而我朝截然首出為一王法立經陳紀大括宇宙細盡
事物不資載籍動合孔子之道非天啟大聖為斯文主
以康濟斯世而能然耶而天造草昧一元塊垓之始戡
定雖武文之用實行其中猶秋之有春藥之有食所遇

之時異所施之偏有不免爾天常人紀自然之理則無
時無地而不載焉世祖既城開平尋升上都文治益修
至元六年命留守臣顏蒙古岱作孔子廟都城東南仁
宗皇慶二年命留守臣賀勝重葺舊殿增廊廡齋廳庖
廩庖湍門閤垣墉西偏為堂廬以待國子分學田坐雲
州者六十頃五十九畝興州又十四頃以教以養作人
之盛蔚乎首善之地矣今上當宁大臣協贊益闡大猷
使萬世之遠億兆之衆皆知孔道之可尊而祖宗功烈

有萬可述獨及此者誠以斯道在天地間一日不可無
一日而無猶天運之或息無以爲天地矣而貽謀垂憲
舍是無大後世尊而行之其於治天下成規大法特舉
而措之爾臣聞道之大原出於天其顯者謂之文帝德
廣運之文經緯天地之謂也天之未喪斯文禮樂制度
之謂也刪詩定書繫周易作春秋孔子之文也彼深文
小道急近利務末效漸漬馴致貽禍國家雖以王文統
之才卒負任使世祖明斷罪人斯得况下是萬萬者乎

均謂之文可不知所辨哉士之藏修於是學者其慎擇
從自格物至於平天下皆斯道也繼自今萬億年開太
平之基以上副列聖崇文重道建學作人之意顧不偉
歟臣有壬謹拜手稽首而獻頌曰聖神立極順天應人
謀始斯臧繼體惟寅道有大原顯者為文爰出萬亿茲
其大鈞金革土沸弦歌載詢考禮綿蕝徵賢蒲輪灑水
之陽龍岡作都據其上游建瓴中區乃咨守成大本在
儒國都閭巷有師有徒茲惟首善盡示遠圖咫尺象魏

作宮渠渠南面圭衮北庭詩書列聖繼明顯承弗替既
極其稱復新其敝居以餼廩蒐以科第百年長育四海
漸被教隆化洽人有士風引而伸之萬世攸同皇帝曰
俞汝臣有壬紀載釋辭後因有令拜手稽首天子萬年
斯文斯道如日在天天地位焉萬物育焉拜手稽首天
子萬年

大都三皇廟碑

三皇置一廟有司以時祭享昉天寶六載我元稽古崇

德報功元貞初天下咸秩京師歲春秋御祝香祠以太
牢宣徽供饌太府出銀幣大興府給事而太醫院主之
三獻奏名蒞事禮崇物備非唐可擬顧惟殿宇涉久傾
圯院使休格諏咨同官合辭上請勅工部重葺寢廡齋
室應同繚垣以及城坪炳煥俱新而碑未有紀至元三
年歲丁丑十月壬午偕院使哈喇岱五十四經歷布延
特穆爾請於太師秦王達爾罕右丞相巴延協議敷奏
制可中書參知政事臣有壬製文奎章閣大學士臣庫

庫侍書學士臣師簡為書若篆中書移臣有壬臣有壬
不敢辭洪惟三皇繼天立極生民以來君德最神聖者
也十三卦言其功不及其德合元相春言其德不明其
功德無能名功無所歸一有形喻蠡海而管天矣醫家
者流果得而專乎徵諸掌故大德間陝西行御史臺議
名醫配祭定制禮官議開天建極者列以十人則專為
醫其可禮部建之至大間湖廣省請名醫配享坐次禮
部議視大儒從祀列置兩廡豈一時不考大德之議而

許之耶豈以素問稱黃帝本草稱神農而亨庖始庖義
耶而天下遂為定制矣昔在壬辰太宗皇帝慮人有札
瘥天死也羅天下醫置太醫大使佩金符辛丑立太醫
院總其政憲宗皇帝癸丑冠以提點世祖皇帝中統庚
申給銀章又別置太醫院丙子合二為一戊寅冠以禮
部尚書癸未改尚醫監秩正四品乙酉復太醫院秩正
三品成宗皇帝大德辛丑升正二品帷幄重臣領之其
貴且重視同醫師秦漢而下太醫令丞不侔矣補太醫

員慮不根學試嚴科條入官階升迄長其院尚方侍湯
液諸王重臣請醫奏遣之郡邑設學置教授正錄教諭
員教其術業又置提舉司其戶調自為銓衡吏部不得
而可否也閭閻細民征戍病卒惠之有局待之有堂著
於格令以廣好生之德者厥惟至哉生民林林夫婦父
子君臣上下之分定飽食煖衣養生送死之具備禮以
維之刑以弼之萬世永賴可必也而四時陰陽之沴感
之為疾有夭死者已則不能必其無也於是為方技以

待之在三皇功德雖猶海之一勺天之昭昭然亦於生
民之大者歟天下祠事俾醫尸之其以是也夫用是諗
於其官若學者曰學治國具也古一而我三焉國書一
代同文之制儒以明人倫醫乃鼎足峙者以其為業重
且難故也技而進於道者也故必參造化之機窮事物
之理而又存之以仁濟之以廉者其庶幾乎內經尚已
近可訓者亦知孫思邈之論習業乎妙解百家探賸具
學醫始無滯周醫師歲終稽其全失民有死終疾醫各

書其所以入於醫師若是其嚴也其或懵經旨而冥行
席世名而無實熟一方而自售偶一效以自信斃人不
刃者雖有常刑而逝者不可復矣蓋思列聖崇秩建學
之意而慎之哉且醫之責在師師之責在總於上者擇
之精布之天下則人之鮮於藥者免矣班格又以銅人
圖經字漫屋推徵考無從得請修治治其具以待其人
其知長人之責者乎京師天下原祗大官蒞之故將達
於流而暢於枝藹乎生民之遂其生也不然三皇天地

其居也元氣其神也何有於一室之修廢耶我元紹天
闡繹尚質素以基皇德其亦皇首之初乎皇帝擴列聖
好生之德開壽域續民命至和淪浹踵而齊泰矣於以
昌聖躬萬億年無疆之壽於以固國家萬億世不拔之
基於戲盛哉臣拜首稽首敢對揚天子之休命

勅賜經筵題名碑

世皇經營六合崎嶇金革間首索金餘黎獻及一時經
術之士諏咨善道及正九五益崇文治至元三年十二

月遣中都哈雅諭旨儒臣朕宜聽何書其議選來進於是商挺姚樞楊果竇默王鶚言帝王之道為後世大法皆具尚書乃以進講八年許衡安藏進知人用人德業盛天下歸之說深用嘉納仁宗御極臺臣請開經筵乃命平章政事李孟時入講誦泰定間始以省臺翰林通儒之臣知經筵事而設其屬焉今上皇帝法聖祖之宏規考近制而損益之開宣文閣選中書樞密御史臺翰林國史之臣以見職知兼經筵丞相獨署以領重其事

也其下有兼經筵官參贊官譯文官率以中書翰林僚幕若閣屬為之而不常其員又其下譯史三人檢討四人書寫五人宣使四人有公移翰林國史知經筵者署之仍用國史院印章奏為著令至正七年正月二十日知經筵事翰林學士承旨都哩特穆爾暨領經筵事中書右丞相伯勒齊爾布哈奏經筵啓沃聖心裨益治道甚盛事也領知若兼之臣宜立石以記其姓名擬翰林學士承旨臣有壬為記御史中丞臣多爾濟巴勒為書知樞

密院事臣太平篆其額制可臣有壬竊聞聖人之道為
天地立心為生民立極為萬世開太平之基斯道之明
其本於學乎賈誼謂人君不可以不學故雖聖人亦資
於教五帝三王皆有師而求多文學古訓遜志時敏念
終始典于學不獨殷高宗為然古今帝王之至訓也漢
之賢君祖德師經承師問道致治之盛其有以哉若天
祿石渠白虎華光與夫唐之弘文集賢名雖不同其討
論墳典圖畫治平皆經筵也我世皇徵用儒雅開萬世

太平之基薄漢唐而不居一本聖人之道垂裕後昆皇
上以天縱之聖留心經籍緝熙聖學治效之隆視中統
至元無忝矣臣有壬承乏經筵前後且十有五年每番
直進說天顏怡悅首肯再四經旨淵奧有契宸衷聖德
日新宗社億萬年無疆之休此權輿也講文附經為辭
若古疏義而敷繹之繼以國語譯本覆誦於後終講合
二本上之萬幾之暇以資披閱焉夫官署題名昉自近
代百司且有之況國家崇儒重道講求太平之大者乎

凡與是選莫不以為榮遇而列其姓名者不特榮遇而已抑將勵其傾竭忠誠以格天心勿使後之觀者指而議曰某但榮遇耳則斯石也不為觀美文具矣

勅賜大司農司碑

語不云乎百工居肆以成其事有其地則有以庀其司鳩其人則有以偪其功苟判渙無統遷於異物求業之精不可得也百工且爾況崇位重秩而亮天工者乎大司農總天下農政其崇且重視古有加焉釐務之司宜

雄大華邃而因循卑陋不稱位秩時雍坊故相巴延之
居實甲諸第堂皇突兀宛若公廨重階連棟櫛比鱗集
傍可僚幕列可曹局帑庾固密可以儲金幣棲簿書概
以官府所宜有者無一不具既歸之官雖力可請賜而
土木勝人不敢居也僦之齊民收其租入則虞烏合雜
糅日就廢壞獨有闡為公廨是稱是宜乃至正六年閏
十月二十五日大司農納克楚僧格實哩大卿哈達拉
圖喇特穆爾少卿穆爾茂蘇默司丞班珠爾王恪經歷

庫春特穆爾都事托音奏凡地舍邸肆沒入者悉歸農
司已延之居在其中議諸中書農司宜用為解制允其
請遂遷而闢治焉明年二月二十一日大司農僧格實
哩吳秉道大卿哈達拉圖喇特穆爾少卿穆爾茂蘇默
司丞班珠爾經歷庫春特穆爾都事托音等覆奏解
既得請宜紀其故勅翰林學士承旨臣有壬文諸石洪
惟聖天子敦農務本責成其官因紀其居紀天休播後
世宜也然古人緩於頌而急於規故槃席几杖觴豆弓

予莫不有銘以示戒也一器之微為戒若是則堂高數
仞椽題數尺可以因其地以勗其思居其肆以成其事
哉帝王之治厚生而已唐虞大聖首重命稷箕疇八政
周詩生民七月皆王道之始也世祖皇帝稽古建官特
立農司雖品秩之隆殺分釐之內外時有不同其所以
敦本抑末責成實效則無以異也仁宗皇帝崇其秩從
一品位之崇也其望益隆秩之重也其任益大况一新
其廨百工有肆矣亦究其事之成與不成乎且農司之

立七十七年其設置責任之意播種植養之法網以總
於內目以布於外者燦然畢陳密而無隙矣責之也嚴
行之也久其效宜何如哉今天下之民果盡殷富乎郡
邑果盡其職乎風紀果盡其察乎見之簿書者果盡如
其說乎政猶解也嗣而居者亦思所以責其實保其完
舉其什苴其漏乎方今農司之政其概有三耕耜田以
供宗廟之粢盛治膳羞以佐尚方之鼎釜教種植以厚
天下之民生尊卑之勢不同理則一爾卑或凋敝尊孰

與奉厚之道其農政之先務乎昔韓愈取巧者王承福之言操鋤入富貴之家有一至再至而為墟者以其屋之歸於官也其要則曰食焉而怠其事必有天殃臣於是重有感焉昔過其門莫敢仰視一旦為我所有而治事其中念彼之失我之得也敬畏之心惕然而生矣則是廨也非我龜鏡乎持是畏敬以治其事則事無不成也於農政也何有

至正集卷四十四

欽定四庫全書

至正集卷四十五

元 許有壬 撰

碑志

勅賜重修陝西諸道行御史臺碑

至正丁亥十一月庚戌日南至皇帝燕延春閣御史大夫臣納琳等奏陝西行御史臺歲久屋弊既徹而新擬御史中丞臣有壬文其故於石制可臣有壬承詔謹按

其狀而筆其概曰臺治位今奉元城之艮隅且五十年
罅不即填橈不即易馴玩將不可支歲辛巳都事樊執
敬言行臺據雄鎮具瞻重威廢乃若此今不亟修後費
滋甚乃移文中臺再閱歲始報可於是市材秦隴得木
山積瓦甍百需靡不具集而尋引斧斤稽而不用乙酉
冬十月中丞韓嘉訥莅止按視儲木暴露而衰朽已過
半慨然率作俄復召入累遷為御史中丞奉元無良梓
人巧者以告中臺中丞為請諸尚方擇精其藝者乘傳

而往侍御史沙巴爾李好文都事朱守諒輩得以偃其功
焉丙戌五月庀工六月中丞都斯默色治書侍御史羅
羅至九月正堂暨幕署告成且輟且作中丞趙得壽侍
御史慶善繼之明年四月韓嘉訥復來為御史大夫八
月侍御史實喇卜至後先協恭迤邐就緒入冬而落馬
堂扁至公仍其故也袤深五尋有二尺廣九尋挾以翼
舍麗以兩厦貫以修廊屬以圓堂東西曹局各二十六
間過廳前峙照磨所附其西位置秩秩察院若掌故帑

藏不易舊貫他悉一新庖傳廐樞各底堅好堂北伐土
泉湧因浚為池益以龍首渠水構亭其上池陰東西各
為亭基城東北作屋以脩登覽前三其門引暎峻邃先
是出入危巷狹隘迂折民居直其衝者願輸為道倍值
酬之闢為通衢如砥如矢是役臺官總其上僚屬奉於
下舉盡恪恭毫釐之費皆出臺儲以故工不知勞民不
知擾考室度功名雖曰修而實則勦矣我世祖皇帝至
元戊戌建御史臺以清風俗以正百司而政之布報地

之逖邇有不齊焉丙子平宋明年立南行臺總十道以
按三省雲南則提刑按察司治之尋升行臺以按邊徼
邊徼既寧相地之宜以大德丁酉四月移治京兆是為
陝西諸道行御史臺按陝西甘肅四川雲南四省總陝
西河西西蜀雲南四道廉訪司而節制於中臺焉關中
東控中夏西南北極邊陲樹之行臺俯制部屬崇嚴之
勢立則敬畏之心生敬畏之心生茲用不犯矣此其小
者爾若夫消奸邪於未萌軋豪猾不敢喘氣使山川失

險里巷不驚臺與地亦重矣哉臣有壬考其歲月因有以觀政焉廨弊已久始有修葺之議又七年始有成其不至傾圯幾希今也堅足以待歲月密足以抗風雨崇足以警部屬為政之道豈外是哉建臺八十年来中外憲條無一不備玩而不舉亦猶是屋一有振起煥然截然故未墜也然臺有恒言謂之風憲亦有說乎風者天地之使也王者之聲教也故上行下效謂之風憲者法則也周禮懸法示人曰憲法則是風之與憲二而一一

而二者也可相有而不可相無者也風主於教憲主於法上之行下有不能效者則繼之以法未有專主於法也我正而後責人以正我廉而後責人以廉苟不是求一以枉法惠文從事待若束濕視若寇讐不亦昧於風之為義乎故必先之以風而後之以憲二者不使偏廢則吾政之修與弊俱新且於其未弊而時葺之則弊與吾政其永無弊矣臣有士為是說以答明詔庶乎古人作器有銘之義也董治察案中更非一皆刻名碑陰以

著其勞焉

勅賜興元閣碑

太祖聖武皇帝之十五年歲在庚辰定都和林太宗皇帝培植煦育民物康阜始建宮闕因築梵宇基而未屋憲宗繼述歲丙辰作大浮屠覆以傑閣鳩工方殷六龍狩蜀代工使能評督絡繹力底於成閣五級高三百尺其下四面為屋各七間環列諸佛具如經旨至大辛亥仁皇御天聞有弊損遣延慶使綽斯戡輦鏹葺之又三

十二年為至正壬午皇上念祖宗根本之地二聖築構
之艱勅竒凌府同知今武備卿布達實哩暨嶺北行中
書省右丞今宣政院使伊魯特穆爾賚督重修歷四年
方致完美周塔塗金晃朗奪目閣中邊頂踵鉅細曲折
若城平隄堊靡不堅麗精至重三其門繚以周垣煥乎
一新縣官出中饒楮幣為緡二十六萬五千有竒費視
昔半而功則倍之丙戌十一月七日上御明仁殿中書
省臣奏閣修惟新不可不銘勅翰林學士承旨臣有壬

文諸石臣有壬拜手稽首而言曰天地運用之妙臣無得而名焉即其形迹近者言之風雷雨暘之散動潤烜發生萬物者皆自上而施於下源泉陂澤之流通行泄灌溉大田者亦由高以及乎卑我國家興王之地俯瞰萬國大聖人首出庶物位乎天德引闕導萌紐牙開闢而後蓄而未發之氣以資始品彙自上而施於下由高以及乎卑故澤之流如高屋之建瓴師之出如泰山之墜石功烈之成登三邁五漠而下莫我儗也定都和林

造邦之基立矣太宗憲宗雖干戈間而以不嗜殺人為
心聞象教清淨覺皇慈仁之旨有契宸衷資其說以格
蚩蚩之未格者非大示尊崇則無以為感觸之地而大
聖人鑿空四海撮土八埏囊括宇宙席卷河山之量實
非朕於是焉臣有壬生長熙洽之世朔南名剎罔不歷
觀聞嶺北人談閣之大竊疑其夸質諸嘗行陝蜀江廣
閩浙且仕嶺北之人信天下之閣無與為此也昔祇洹
寺基八十頃一百二十院祇陀須達二人成之我國家

富有四海視布地之金特錙銖耳則此閣之締構峻偉
傑峙與雪山相高驚嶺倖盛宜也閣始無名但以大閣
寺著稱皇上賜名曰興元之閣蓋經始之日實我元順
天應人龍興之初名協乎實矣且和林自元昌路為轉
運司為宣慰司又為嶺北行中書省丙辰迄今九十一
年而列聖峻極之蹟雄都瑰異之觀無一人一言及紀
述者一旦形諸玉帛刻之堅珉遲速其亦有緣乎於吁
休哉為大利益其可量也夫銘曰

鴻蒙再開世再初聖神立極卑黃虞建邦乃握天地樞
俯拾萬國如墜枯嗷嗷赤子飢待哺后翼後我來其蘊
天戈豈欲專天誅心以不殺人自孚願茲象教非虛無
與我異世而同符以大智慧明羣愚開極樂國包寰區
祇園方欲鳩其徒乘龍遽爾反鼎湖後聖繼作志不渝
巍巍成此覲率居不宏其規豈遠模矗天拔地高標孤
中有屹立金浮屠諸佛環擁分四隅至大修廢走使車
三十一年等須臾吾皇法袞恢聖謨坐令金碧新渠渠

龐恩覆幬均堪興如閣容塔綽有餘中書有請帝曰俞汝臣有士其大書不蹇不磷磐石如億萬斯歲綿皇圖勅賜推誠宣力定遠佐運功臣太師開府儀同三司

上柱國曹南忠宣王神道碑銘并序

曹南忠宣王薨六十年若乃祖乃父豐功高烈墓道之石歲未有紀至元六年歲庚辰十二月己亥中書右丞相臣托克托左丞相特穆爾布哈等以聞勅中書參知政事臣有壬為銘翰林學士承旨臣庫庫為書翰林學士

臣玄篆其額臣有壬承命兢惕而竊又自幸皇帝不以
臣庸劣俾參台司而王之子臣托歡實平章政事世講
誼篤當悉其家世飭其未至以章視來世矧威命有赫
其敢以弱陋辭王諱阿喇哈蒙古扎喇爾氏祖諱博綽
贈定威佐運功臣光祿大夫司徒上柱國追封曹南王
謚忠定父諱伊埒肯贈宣忠靖遠佐運功臣金紫光祿
大夫中書右丞相上柱國追封曹南王謚桓毅祖妣塔
布妣威喇俱追封曹南王夫人忠定幼宿衛太祖皇帝

服弓矢職割烹從征屢有功竟死於戰桓毅嗣宿衛事
約爾珠太子從庫楚胡土克圖太子伐金遂侵宋以功陞
萬戶尋以天下馬步禁軍都元帥副大將察罕征討察
罕沒遂代之統大軍攻淮東西諸城至廣陵戰沒王嗣
職統其軍已未從世祖皇帝渡江破宋師隆興北山還
上都賜黃金五十兩中統初詔將所部討阿拉克岱爾
琿塔罕追至河西有功二年從征額呼布格賜金篋一文
綰九三年從宗王噶必齊討李璫賊搯老僧口日夜搏

戰走之奪其鎰重進拔濟南賜金鞍文錦各一黃金如
上都數四年春賜虎符銀章至元四年有事襄陽走宋
師安陽灘賜白金衣物五年大軍圍襄樊分戍百丈山
以猗宋師戰累捷十年拔襄樊十一年略地郢復奪郢
州南門堡視地勢可達戰艦於江遣色勒敏白大將自
沙蕪口入江取鄂州沂江陵復遵陸略地至鎮江十二
年擢昭毅大將仍蒙古軍馬軍上萬戶權行中書省事
駐建康與右丞相巴延參政董文炳為三道水陸分進

期集臨安王以右軍取道獨松關破東塢訾至護牙山
遇宋師手斬其將杜總管獲甲首數百入溧陽界復值
宋師斬騎將二人擒裨將祝亮等四十二人斬首三千
級進拔溧陽獲首虜七十戰章步橋斬其將吳奉使斬
首三千級進攻建平破之斬吳許兩總制拔廣德西安
長興攻獨松關擒谷總制至栢市擒其將張八斬首二
千級進中奉大夫行中書省參知政事十三年三軍會
臨安宋亡九月徇浙東未下郡縣所至納款降趙提刑

等五百餘人追宋宗室秀王與擇於閩至福安轉戰四十餘里殺其步帥觀察使李世達於陣俘與擇及其子弟監軍趙由懌防禦使林德獲印章五器仗萬計安撫使王吉等皆望風降偏師入興化擒宋相陳文龍招降宋官二百餘人淮兵三千人江南平十二月以行中書省參知政事行江東道宣慰使十四年入覲進資善大夫行中書省左丞仍宣慰使十六年進資德大夫行中書省右丞使如故十八年入覲賜玉帶弓矢進光祿大

夫中書左丞相行中書省事統師四十餘萬征日本次
明州而薨年四十有九是年十月吉日葬曹州濟陰縣
郭村之原初贈協謀佐理功臣太師開府儀同三司上
柱國曹國公謚武定加進推誠宣力定遠佐運功臣太
師開府儀同三司上柱國追封曹南王謚忠宣配托端
庫庫楞呼圖克台並封曹南王夫人子男二曰伊蘇岱爾
襲左手蒙古軍萬戶天歷初有擁護功遂參預河南省
三轉知樞密院出為河南省平章政事兼山東河北蒙

古軍大都督入為集賢大學士進銀青榮祿大夫薨曰
托歡起家同知蘄州路四轉為河南左丞由南臺侍御
史再遷為西臺御史中丞母疾棄官歷江西湖廣江浙
三省平章政事進階光祿大夫拜南臺御史大夫改河
南平章以母老辭至元六年拜中書平章政事在政府
念母老而遠語及輒流涕南臺總十道按三省非重臣
不可復拜御史大夫且便其養也女五人適管軍總管
呼喇濟珪齊衛副使巴哈穆爾蒙古軍千戶塔察爾真

定路總管哈喇遜蒙古右手萬戶額爾濟納孫男女若干
皇元以仁武取天下艱難肇造與共事者惟國人耳而
國人中尤賴以濟者若扎喇爾氏則四傑之一馬王之
乃祖乃父無征不從無戰不捷而所部之士威信素著
如臂使指無不如志天下既一俾率其部而世其職雜
居腹心之地以制四方世祖皇帝萬世之遠圖也王明
而恕謀而有斷始襲其部士皆樂為之用提兵鼓行指
期制勝其追叛河西攻堅屢下力戰襄樊略地郢復可

謂雄偉之績矣若夫卷甲沙蕪而長江失天塹之險分
節獨松而重關若無人之境卒使宋主面縛海隅風靡
則無忝爾祖而世篤有加焉日本之役未至而薨厥後
蹉跌貽悔識者謂使王在當不至若是也皇元屈羣策
以一區宇舊勞之臣耆艾熾昌者非一王暨祖考皆死
戰陣以致寧教乃身不享之昔賢謂世德之臣厚施而
不食其報然後其子孫能與守文太平之主共天下之
福王壽不滿其德而二子佐列聖重熙之運皆致位崇

極王薨甲子一周矣賜銘墓道哀榮益新又立祠建康
賜祭田千畝世福蓋未艾也嗚呼崇德報功朝典縟矣
歸美報上獨不在王子孫乎臣有壬再拜稽首為之銘
曰

於赫天造秉鉞四馳芟夷蕪梗以式九圍河嶽喬貴
胄接武闕如奮出奔走禦侮桓毅之子忠定之孫率我
舊部勗我鋪敦帝命南伐潰襄拔郢夷庫既塞我旅爰
整嘽嘽匪車舟乃陸通投鞭斷江率許而東三軍犄角

分趣吳會遂起溧陽肆我禡類角崩稽首漿壺食簞廣
德弗城獨松弗闕大會臨安組頸道左乾清坤夷四方
來賀叢爾島夷乃敢不庭皇風播海長星墜營許許郊
原鬱鬱王兆焯勤崇極中以廟貌既歷五紀盍文其碑
亦惟天道遲速有時假寵九原追功未墜聿聲其休永
錫來裔

至正集卷四十五

欽定四庫全書

至正集卷四十六

元 許有壬 撰

碑志

勅賜崇源寺碑

主實喇鄂爾多皇后巴爾圖言夙侍武宗皇帝被恩務
報而智力靡它作崇源寺資薦冥福請記諸石以昭臣
妾事主之誠中書省以聞臣有壬承詔當筆即其狀筆

之曰巴爾圖克呼氏年十三入宮武宗潛邸早受知遇
及正九五賜內帑楮幣俾作梵宇以踐矢言工欲成而
宮車脫駕矣事太皇太后益著恪恭英宗熟其賢命立
太祖皇后完顏氏鄂爾多三年徙居世祖皇后凡實喇
鄂爾多譯言帳殿也國制列聖賓天其帳不曠以后妃
當次者世守之實喇則又序於諸帳之上者焉其徙居
於是也地位益榮賜賚日裕惟被恩未報是懼爰念國
家尊崇釋教嚴飭寺宇予以祐國庇民者殆徧天下女

人知力有度越如是者乎初仁皇居東宮賜昌平縣史
村田七百畝乃即賜田力事締構為報恩地形與壇
閉闕邃嚴正殿位佛後殿栖經翼舍其旁武宗神御冠
其北而方丈拱於後殿西為雲堂東為香積周廟以居
其徒節庾庖湍靡不華備作於泰定甲子三年迄功俾
崇孝僧恒照主治今恒湍繼之楮幣計緡三十餘萬不
資於官不假於人勞費亦至矣臣有壬竊聞佛之教大
彌六合細入無形顧臣固陋何足以知之而所知者則

佛以報恩為第一義故佛書有報恩經首稱波羅門子
孝養及須闍提割身肉以飼父母弘衍其說以及報恩
之義厥有旨哉夫所謂報者不獨子之於父母也若臣
之於君也妻妾之於夫也弟子之於師也凡人之於所
遇也有所得則報之不以多寡計也吾儒亦言受人一
飯之恩而不忍忘者其為子必孝為臣必忠一飯之恩
至微也而不忍忘之則其受人之大者可知已世有受
大恩而恬不知報一旦有事乃身先退縮不啻路人亦

獨何心哉況固藏嗇用女人之常雖知其卒無所用寧
終其身以付後之爭者而不肯捐一錢則盡捐所蓄以
報既往之恩不賢能之乎斯石之紀使觀者有激其亦
可裨於世教且使學徒不專於虛寂而凡致力於人事
之實擴而充之佛之向上者可漸得矣臣有壬既紀其
實又效其說為之倡曰

佛有大方便經典演微妙報恩弘至理布教及無量含
靈皆具性感觸隨所見彼姝者貴人淑秀著宮壺受恩

雖錙銖欲以山嶽報况得山嶽恩我報宜何如永矢言
旦旦幽明倏殊邈志堅事竟成傾篋力構築山林爛金
碧奉祀極蠲潔冥冥既資祐且盡未來際佛慈無所擇
散福徧沙界皇祚綿無疆慧日光萬劫民物苟有願佛
悉從所欲凡我林林生學佛當念此為臣勿忘忠為子
勿忘孝人而忘忠孝雖在天地間是不與人等我願推
此道普度一切人俱為忠孝者俱到大智岸

勅賜順聖寺碑

昔我武宗皇帝之在潛邸也今實喇鄂爾多皇后巴爾圖實侍左右既乃從太皇太后於覃懷武皇賓天仍事興聖宮慎畏自持性強記詢往求故應答周悉聖母嘗言覃懷獲歸宏濟聖業非祖宗在天之靈默佑曲護罔有今日故力事崇構資福於佛為祖宗報巴爾圖日聆聖訓而復厚沐撫視乃效聖母報祖宗者以報聖母出奩蓄楮幣三十五萬貫有奇買地都城咸宜坊作順聖寺三門夾峙大殿屹立後建重屋奉聖母神御西為十

二楹連甍有閣竊自為侍祠之地東規如西而殺其後
用皮藏經雲堂香積秩秩有位周廟連屬宏麗靜深祭
通衢為屋三十間取僦資以助恒費經始至治壬戌之
春欲極工緻而監者不稱凡三撤易歷十年而後有成
焜煌絢爛照耀闐闐遇者聳觀買田千畝俾永有食擇
此邱尼管梅卜主之不紀其故恐後遂湮沒以告中書
庶幾上聞而有所屬也省臣敷奏詔臣有士為文臣有
士詞臣也有命弗敢辭臣聞佛之教宏大精微其要惟

欲人同歸於善有不言而自信不化而自行之妙焉其
徒學者女人為此邱尼蓋百不一二佛以女人多疑惑
執著結業纏縛不能自出不使入佛法中而憍曇彌著
卒能奉行祕教宣說微妙所謂身無常身念念遷滅
代謝不足財衆緣所共無有真主其言亦淵矣乎巴爾
圖之報聖母也懇誠追慕老益不替亦善女人信敬佛
法而知所先後者乎身命與旨將究其極若夫舉所蓄
而傾委不靳則已有得於財無真主之言矣昔聖母御

興聖宮受二子十孫三帝極天下之養始終十五年中
間受厚恩而極富貴者不知其幾人未聞有一人奮出
知報者巴爾圖以女人淑柔之質而能若是蓋有關於
風教宜有以紀之也皇上孝治天下事佛之宇列聖神
御在焉聖母既有所矣巴爾圖復此締構非瀆也至誠
展布隨地而見况及事親密從殉無地乃得一睹眸容
與紫金之像白毫之光相為炳耀則孝敬之心油然而
生佛之不言而自信不化而自行者實寓乎其中矣既

述其槩若是且頌之曰

象教若海孰挹其深世玩其迹盍求其心匪今斯今用
有不欽其屋如星其徒如林山臺野邑知幾萬區曰茲
都城鈞天帝居寶構突兀鬱乎相輝國帑海嶽消埃是
靡踴躍有人毫積絲累至於千萬猶水壑委十年營度
始盡厥美聖母在天監觀有赫茲殫之力實母之錫陸
海洶湧出此兜率東瞻徽儀殿咫尺盼嚮來臨神御
有恤聖孫御天治隆孝敬淑媛有請天休丕應小臣載

筆聖德是紀以彰聖治以彰佛旨惟佛之旨有神御祀
祐我聖嗣承承繼繼子孫孫子與天地終始

勅賜故資德大夫御史中丞贈攄忠宣憲協正功

臣河南行省右丞上護軍魏郡馬文貞公神道碑

銘并序

至正六年七月丁丑集賢侍講學士通奉大夫兼國子
祭酒臣天爵言故資德大夫御史中丞贈攄忠宣憲協
正功臣河南行省右丞上護軍追封魏郡公諡文貞馬

祖常早擢高第歷踐要途始終五朝有文有政宜錫碑
紀德庸示報功集賢院臣以聞制可命臣有壬為文臣
玄為書臣起巖篆其額三人皆文貞公同年進士而有
壬託知尤厚始以學士被命繼冒承旨皆在紀述其敢
辭公字伯庸世雍古部居靜州天山有錫哩濟蘇者高
祖也金季為鳳翔兵馬判官死節贈恒州刺史廟賜褒
忠子孫因官以馬為氏曾祖烏呼訥從世皇征宋留汴
掌饋饗累官禮部尚書贈推忠宣力翊運功臣僉樞密

院事謚忠懿祖世昌行尚書省左右司郎中贈嘉議大夫吏部尚書父潤朝列大夫同知漳州路總管府事贈中奉大夫河南行省參知政事追封梁郡公妣楊氏追封梁郡夫人梁公官浮光因家焉七歲知學得錢即以市書十歲見燭歌燒屋解衣沃水滅之人歎其異蜀儒張公顓講經儀真公未冠質以疑義數十張公竒之科舉詔下鄉會試皆第一廷試第二蓋以國人冠也授應奉翰林文字承事郎同知制誥兼國史院編修官拜監

察御史仁皇久正宸極猶居東宮近侍利燕飲得售所
請公抗言當御正衙立朝儀御史執簡太史執筆雖有
懷姦利已乞官賞者亦不敢出諸口承天地祖宗之重
當極調攝至於酒醴近侍進御當思一獻百拜之義英
廟為皇太子請慎簡師傅下至臣僕亦宜精擇時大姦
當國公首知其盜觀國史洎同列疏其十罪仁廟震怒
罷之黨與之布列要地者皆論列黜之端人昔與抵牾
而擯斥者請拔用之秦州山移公言山不動之物而今

動焉豈在野有當用不用之賢在官有當言不言之佞
大臣皆家居待罪薦賢拔滯知無不言改宣政院經歷
月餘辭歸起為社稷署令罷襍事於泉南大姦復相左
遷開平縣尹欲中傷之退居浮光大姦死除翰林待制
泰定建儲擢典寶少監太子左贊善尋兼翰林直學士
成均釋奠陳太子視學之禮內出禮幣命公助祭除禮
部尚書祖母張夫人卒護喪歸起為右贊善復禮部尋
辭歸天歷初再使召為燕王內尉仍入禮部兩知貢舉

一為讀卷官時號得人參議中書省事參定親郊典禮
充讀祝冊官禮成賚金幣拜治書侍御史錫犀帶及御
書奎章閣記內廷宴服七襲金玉腰帶各一政徽政副
使拜南臺中丞今上即位召議新政賚白金為兩二百
楮幣為貫萬金織綺為端四改同知徽政院事拜御史
中丞以公疾特免朝禮命光祿日給上尊知經筵進說
必陳經史大義參以祖宗故實持憲務存大體西臺御
史劾其僚禁酤時面有酒容以苛細黜之山東憲以孔

氏訟聞以事闕名教不行按者亦引去司憲有以貪墨敗沒入其田廬請歸曲阜陵廟從之拜樞密副使居無幾辭歸復南臺中丞遷西臺疾不赴積潛自承事郎至資德大夫至元四年三月丙午薨於光州之第得年六十是年四月壬申葬州北平原鄉西樊以里有司以聞有令贈謚配索氏封梁郡夫人子男二武子承務郎湖廣行省檢校官文子徵事郎秘書監著作郎孫男三女二公言事剴切嘗建議國人暨諸部既誦周孔書當遵

諸誨以厚葬倫兵家子驕脆有辜任使庶人挽強蹶張
老死草野當建武學武舉儲材以備非常時雖勿用識
者建之至於論刑則一本哀矜常言死罪過赦且原減
死流徙未蒙殊渥當驗情寓恩內徙漢人滿百執弓矢
獵者死不及百者流條格已有禁弓矢聚衆之條又復
為此是錯綜網羅之誠恐愚民舉足蹈罪至論建德民
妻之不肖夫死者則當以必死其得用法之意乎國家
涵濡百年譽髦斯士公先世已事華學至公始大以肆

為文精核務去陳言師先秦兩漢尤致力於詩凌轢古
作大篇短章無不可傳者與修英廟實錄譯潤皇途大
訓承華事略編集列后金鑑千秋記畧若干卷至順間
龍虎臺應制賦詩有玉食之賜嘗進擬藁為之歎曰孰
謂中原無碩儒乎文集若干卷臺檄刻之楊州郡庠仁
皇始行貢舉國人而下列為四色國人洎諸部為右榜
試目視左榜差優公雖右列左列及之者指未易屈焉
且其為學初不為貢舉也以挺特之資丁文明之會裒

為舉首副至達官威重足以鎮薄俗文章足以追古作
議論足以正風俗設科得士不得不以延祐之初為盛
也不幸壽僅六十未究其用悲夫銘曰

元大一統六合同風南臺北萊莧生其中部族有儒文
貞伊始文貞之世翼翼廟祀後承聿修講學諸夏延畀
至公大有無憾蘄然異稟幼不事弄濡衣撲燎智劇碎
甕益習以進益混以翰不溺不流而登於岸先秦兩漢
華咀實擷天籟泠屬石湍激洌天子有詔乃興乃賓實

三其魁一推國人甫試館職倏我鬻冠以爾衲鑿安我
考槃遐心浮雲束帛空谷春坊翊贊經筵啟沃皇格於
天公司其度俊造鑑衡風紀砥柱龐恩異數川委充溢
云胡修途六十而柅旣易其名亦大其封於光之原賜
碑崇崇賜碑崇崇於赫厥銘同年之紀考信匪誣維爾
部族文貞有躅叙倫敦典益介戩穀

勅賜贈中奉大夫河南江北等處行中書省參知
政事護軍追封渤海郡公吳公神道碑銘

至正七年八月癸酉皇帝御慈仁殿中書省臣奏江西行中書省叅知政事臣吳秉彝既封其親請刻銘以昭天休制可詔御史中丞臣有壬為文臣有壬竊謂凡為人子孰不欲顯其親然祿不逮養雖萬鍾五鼎有不易其風木無涯之感者矣國家隆推封之典無間存沒庶幾追其不可復者以慰人子之心所以嘉惠臣下篤於古矣貤恩隱卒君之仁也立身顯親臣之孝也仁孝胥盡猗歟盛哉謹按贈中奉大夫河南江北

等處行中書省叅知政事護軍渤海郡公諱良字良卿
世家於燕大父諱榮父諱德信贈嘉議大夫禮部尚書
上輕車都尉渤海郡侯妣錢氏渤海郡夫人郡公早以
孝稱未嘗一日去親側禮部患疽齋沐禱於神日祝以
愈兄弟三人友愛尤篤兄貞監太寧路瑞州酒稅當輸
納於府州扼山瀕海溝港沮洳方六月暑雨迫官程不
敢緩與弟用子秉衷偕行道出兩山間溪水卒至貞半
涉為暴流所汨秉衷走援用繼之皆溺死失屍所在訃

至禮部哀摧幾斃甦復不食郡公仰天慟哭而慰其父
曰兄若弟姪之不幸命也兒必得骸骨而反於是徒跣
求之暑途浮漚不遠千里汴汭溪澗凡波流旋折沙礫
隱起靡不剗索號泣水際日益不懈物色衣履果盡得
三尸歸至大庚戌十月缺日卒於家壽五十有二配高
氏追封渤海郡夫人繼宋氏男一即秉彝女二適崔昇
高秀皆士族貞一女齒齕失父遂子之每曰吾兄遭酷
禍遺脣止此當擇壻以嫁後適董繼昇仕至江浙省叅知

政事封隴西郡夫人孫男一庸國子生孫女一適應奉翰林文字劉佐平生樂施與宗姻朋舊有喪葬不能舉子女不嫁娶者悉助成之卒之九年秉彝始起家為河間路興濟縣主簿累遷懿州知州懿附治遼陽省割割梗阻秉彝居七年名籍甚拜監察御史由兩部京府出典兩郡庶一道入踐歷宥密憲臺中書遂參預行省距郡公之卒三十有八年矣嗚呼吳氏之先其世有隱德乎何其後之盛而報之侈也郡公發不自躬委祉後人為

善之效章矣秉彛嘗守臣鄉郡郡人念紀其善於石未果而承詔銘其父碑夫豈偶然者哉銘曰

吳為周宗實始泰伯長沙在漢仍啓王國世遠族綿布
獲四方為士為庶或隱或章有家於燕邈聽泯泯淵泉
時出厥後以振亢宗匪爵詒謀維義手足三人遽失其
二哀哀猶子俱為湘纍翁將殞絕兒忍子遺骸甃不生
猶愈暴棄矢言卒踐與匱偕至行修於家仁施於里貴
壽弗有以遺其子其子其承聲實非歟踰踰賢勞席不

暇煖酬功孔渥渤海啓封匪恩之私維報之隆邦畿土
良幽宮是宅勗爾著存視此銘刻

至正集卷四十六